

Informacion mbi takimin e Delegacionit
qeveritar ekonomik te kryesuar nga shoku
Abdyl Kellezi me shokun Mao Ce Dun

Ne mbremjen e dates 14 janar 1962 shoku Mao Ce Dun dhe shoku Liu Shao Shi priten ne takim delegacioni ekonomik qeveritar, te kryesuar nga shoku Abdyl Kellezi. Ne kete takim mernin pjese:

Nga pala kineze shoket: Mao Ce Dun, Liu Shao Shi, Li Sin Nien, Lo Lui Cin-zevendes kryetar i Keshillit te Shtetit-, Je Ci Cuan-Minister i Tregetise se jashteme te RPK-, Fan Ji-nen kryetar i Komisionit te Planit te Shtetit dhe drejtor i Drejtorise qendrore te marredhnieve te jashteme ekonomike, Huan Cen-zevendes minister i puneve te jashteme-, dhe Li Ciang-zevendes minister i tregetise se jashteme te R.P. te Kines.

Nga pala shqiptare mernin pjese shoket: Abdyl Kellezi, Kico Ngjela, Pupo Shyti, Reis Malile, Milo Qirko, Ramis Xhabija dhe Vasil Kati.

Ne fillim u zhvillua nje bisede per afro gjysem ore dhe pas saj delegacioni u ftua ne nje salle tjeter per darke, ne te cilen mernin pjese te gjitha personat e sipershenuar. Ne forme te permbledhur me poshte shenojme biseden qe u zhvillua ne kete takim:

Shoku Mao Ce Dun: pershendet delegacionin, dhe pyet kur ka ardhur e sa do te qendrojne.

Shoku Abdyl: i jep pergjigjen e rastit dhe i sjell pershendetjet ne emer te shokut Enver, shokut Mehmet dhe gjitha Partise e popullit tone.

Sh. Mao: e falenderon per zemersisht dhe vazhdon "kur te ktheheni i transmetoni te fala dhe pershendetjet shokut Enver e gjitha udheheqies se Partise, i urojme atyre shendet, suksese dhe pune te mbare. Veshtiresite qe kane pasur ne pune do te kalohen hap pas hapi. Do te kemi lufte te ashper, (me revizionistet). E verteta eshte e pa mohshme, qielli nuk puqet me token. Ne Kinen e vjeter ka pasur njers qe e mendonin kete!"

Sh. Liu Shao Shi: duke bere alluzion mbi dobesine e revizionisteve thote se "kemi botuar nje liber me tregime se si nuk duhet pasur frike nga djalli".

Sh. Mao: duke vazhduar biseden e hapur nga sh. Liu Shao Shi thote

"Simbas idese se librit, imperializmi eshte djalli i math, Nehrui eshte gjysem njeri gjysem djall dhe Titua eshte djalli. Tani ka dhe djaj te tjere, (le te kuptoje per Hrushovin), por libri eshte botuar ne pranverre te vitit 1959. Ish ambasadori i Bashkimit Sovietik ne Kine Judini, me ka thene se "dhe une dikur kam folur kunder Nehruit, por tani nuk guxoj". Judini dhe disa te tjere nuk u zgjodhen ne Komitetin e ri Qendror (te PKBS), kjo ndodhi pse ata, (Hrushovi), nuk i besojne keta njers. Ka edhe nga ata qe e lavderojne Hrushovin por nuk e besojne ate. Edhe vete Judini ka bere diçka: ne mbledhien e 81 Partive Komuniste e punetore, ai punoj me delegacioni e Indonezise per ta ngritur ate kunder Kines por nuk ia arriti".

Sh. Abdyl: thote se revizionistet i kane pozitat shume te dobeta ne masat e popullit. Ai shpjegoj rastin e nje grupi demonstronjesish perpara Ambasades tone ne Moske, te cilet hidhnin parulla per miqesine midis popullit sovietik me popullin shqiptar.

Sh. Mao: "Ne Bashkimin Sovietik populli ka filluar te beje dallimin". Me pas shoku Mao flet lidhur me mendimet e Judinit dhe Mitinit, ai thote se te dy te sipermit jane nxenes te Tepelinit qe eshte idealist. Tepelini perhapse idealizmin subjektiv. Me rastin e 80 vjetorit te dite lindjes se tij, Qeverija sovietike i dergoj pershendetje atij. Tani atje (ne BRSS), po del hapet idealizmi. Judini dhe Mitini e kane kritikuar Tepelinin pra dhe nuk mund te dalin ne udheheqien e PKBS".

Sh. Liu Shao Shi: "kohet e fundit jane perjashtuar nga Partija Komuniste e Shteteve te Bashkuara te Amerikes kater antare te saj si dogmatike. Keta u perjashtuan se nuk paten frike nga djalli. Ata thane hapet se Partija Komuniste e SHBA eshte revizioniste".

Sh. Mao: "Partija Komuniste amerikane eshte ne kondita shume te veshtira, kerkohet qe ajo te regjistrohet si agjente e Bashkimit Sovietik. Partija Komuniste e Kines do te botoje neseser, ne 15 janar 1962, nje deklarate per te perkrahur Partine Komuniste amerikane. Qendrimi i Qeverise amerikane ka edhe ane te mira pse i detyron njerzit te te dalin ne mal! Me pas shoku Mao Ce Dun flet mbi luften e klases punetore si eshte zhvilluar historikisht qysh prej lindjes se saj deri

ne ditet tona. Ai nenvizoj rolin e marksisteve te shendoshe, te cilet megjithese ishen ne pakice arriten te sigurojne fitoren mbi te gjitha rymat oportuniste ne levizjem komuniste dhe punetore nderkombe-tare. "Nga te 81 Partite Komuniste e punetore, vazhdoi shoku Mao Ce Dun, ne jemi vetem 11 parti, shumica jane ata, por brenda tyre numuri me i math jane ne pozita neutrale. Me shume jane grupi i mesem, keto jane 40-50 parti, keto kane frike nga pergarja. Ne kete grup futet dhe Partija Komuniste e Indise. Ne te 11 Partite po te ngulim kembe Hrushovi nuk ka q' te na beje. Hrushovi preu marredheniet diplomatike me juve, per kete ka bere gabim te math. Ai ju dha juve te drejten ta demaskoni ate hapet. Kembe ngulia eshte fitoria. Ai ju shan dhe ju e shani ate, duhet folur ma barazi!"

Mbas kesaj bisede u kalua ne nje salle tjeter ku shoku Mao Ce Dun dha nje darke per delegacionin. Gjate darkes, ai tha se fjali-min e shokut Enver, te mbajtur me rastin e 20 vjetorit te themelimit te Partise se Punes, ata e kane perkthyer ne keto gjuhe: anglisht, frengjisht, japonisht, gjermanisht dhe spanisht. Duke qeshur, shoku Mao Ce Dun tha se per kete veprintari sovietiket ishen ankuar, ata iu kishen thene shokeve kineze: "mire ju e lexoni per vehte por te tje-reve pse ia u jepni?".

Gjate darkes shoku Mao foli gjithashtu, shkurtaz, mbi rritjen gjithmone e me shume te te forcave te shendosha marksiste leniniste; ai tha se "asnje nga ne ketu nuk i kemi njohur Marksine, Engelsine dhe Leninine, por kjo nuk na ka penguar te njohim idete e tyre, te verteten". Shoku Liu Shao Shi shtojte se "perpara Kongresit te XXII te PKBS Shqiperija nuk njihej mire ne Birmani, por tani ajo jo vetem njihet mire por krijohet dhe shoqerija e miqesise birmano-shqiptare, kjo eshte pozitive".

Ne vazhdim te darkes, shoku Mao Ce Dun pyeti shokun Abdyl: "pas sulmeve te Hrushovit a rritet bari ne malet e Shqiperise?". Shoku Abdyl iu pergjeggj se "rritet me mire se me pare". Pas kesaj

Shoku Mao Ce Dun, duke qeshur, shteje: "Pas sulmeve te Erushovit asnje fije bar nuk ra per toke ne Shqiperi".

Ne fund te darkes shoku Abdyl falenderoj shokun Mao Ce Dun per pritjen shume te perzemert. Ne largim, shoku Mao dhe gjithe udheheqesit e tjere kineze, e percuallen delegacionin deri jashte te automobilat. Aty u pershendeten duke u perqafuar, ne menyre shume te ngrohet miqesore, me te gjithe shoket e delegacionit.

Bashkengjitur ju dergojme tre cope te librit "mos te kihet frike nga fantazmat", ne frengjisht, (dy cope per KQPPSH dhe nje per Ministrine e P. Jashteme), per te cilin u fol sa me sipar nga ana e shokut Mao Ce Dun dhe shokut Liu Shao Shi. Parathenia e librit eshte mjaft e rendesishme.

A m b a s a d o r i
(Reis Malile)

R. Malile